

Mukaana wu a nsomo kundaa Timote OSOMO

Wu me mukaana wu a nsomo wu ósono Poole kunda Timote. Poole áli agyene ku Lisitere mu oyitsala Nsia yi Mbwe. Oko me ku áli okakala Timote. Nde ábaana onama nzili a Kriste ña mbihi a ña ágyughu nde Ndagha a Nzaami yi ókaluo Poole. Nde ádzie mansa malagha ya Poole ya básala emõ ya nde.

Mu matala ma ókagyughu Poole ti bakriste baba mu bvulu limõ bwunu we lini bali mu okatyeghe Nzaami ebughu, bwunu we oli a mandagha oko, nde áli a epfu kii okagweghe Timote mu oyigwa bo maluo. Obo me bu ógweghe Poole Timote ku Efedze mpaala ayigwa bakwuru ba libwunu baba oko mpama. Ngu oko Timote ágyagha mukaana wu. Mu mukaana wu Poole álibili nde mweë mu oyilyele kundaa banga-a-kana ti basa mayele ña nkulu a ba baakaluo baara mandagha mama lisobo ya Nsia yi Mbwe. Poole ályele ndehe si nki bipfu banga-a-kana bafaana okala a bye munsa mabwunu ma Nzaami, ya bunu bo bafaana okasuolo bakwuru ba libwunu li bo.

Bu me bu baakakaba mukaana wu:

- Mamboro (1.1-2).
- Bu ofaana okala laama li banga-a-kana (1.3–3.13).
- Mandagha ma básweghe mu nzili yi liikanama bihi (3.14–4.5).
- Poole ágwi Timote maluo (4.6–6.21).

Mamboro

¹ Me Poole, ntumu a Yiisu-Kriste mu litumu li Nzaami Mubvwuhu a bihi, ya lili Yiisu-Kriste, wu li emiini e bihi,

² nsono mukaana wu kundaa Timote, nkara a mwana a me mu kana. Nyaã ti bwehe, nyĩ ya edzuunu bi bifi kundaa Nzaami Taara ya kundaa Mfumu a bihi Yiisu-Kriste bikala ya we!

Osa mayele mu maluo mama mpya

³ Ti bwunu a bu ángwi me we litumu mu matala ma ákangye me ku Masedwane ti kala ña Efedze, mpaala we kahaba baara babake mu onyaã okatsala nsia a maluo mama mpya

⁴ ya mu onyaã osa mukolo mu masaba ya mu okatanjana mankwumu ma bankagha-kwuru ma magwene a masini. Mandagha mamu maak-aburu munsohobo ña ebini kii osala esala e Nzaami ki baakasa mu kana.

⁵ Mupfunu a litumu lilo ngu osuo dzyi li lifi mu mukolo wu a tse-tse, mu bitsimi bi bibwe ya mu kana lili nganma.

⁶ Baara babake, bu baabihi onama mandagha mamu, baagyene mu okabulusa nkele yi gwene a mubwughu.

⁷ Bo badzyi okala baluo ba mikyene, lo bo bomu ka bali mu okabaghala mandagha ma bali mu okalyele bo o, ngu okala mandagha ma baakalyele bo ya enziini ti mo mali mama nganma.

⁸ Bihi-a-be ligyili osoolo ti mikyene mili mibwe kala ti basalala mye bu ofaana.

⁹ Bihi-a-be si lisoolo ti mikyene ka bágwí mye mu nkooro a baara baba nsumu o, lo mu nkooro a baara ba baagwene okanama Mikyene ya ba

baakagyighili mandagha ma mabi, baara ba babi ya banga-a-masumu, baara ba baagwene okagwa Nzaami budziri ya ba baagwene okagwa bilogho bibi ngili budziri, ba baakadzwa bataara babo ya ba baakadzwa bangughu babo, ba baakadzwa baara,

¹⁰ baara banga-a-enkwunu, babaghala ba baakabvughu mbughu ya banganda babaghala, minta-nkaala mi bankana, banga a mpya, ba baakalaba mukihi wu a mpya, ya baara bwohono ba baakatemele maluo mama nganma ngangala.

¹¹ Obo me bu oli nsia yi mbwe yi a nsia a Nzaami nga a esee, nsia yi mbwe yi baagwi me.

Poole bvurulu matuono kundaa Nzaami

¹² Me mbvurulu matuono kundaa Yiisu-Kriste mfumu a bihi, nde wu aagwi me lileene, mu kulu nde aamono ti me ndi mbwuru wu bakughu osa kana mu nde bu aasi ti me nsala esala e nde,

¹³ me wuulu nsomo áakantsua Nzaami, áakamwehẽ banga-a-kana kimini, nga a enja. Lo Nzaami aamono me nyĩ mu kulu me áakangyighili mandagha mamu kunsu nzimini, wene a kana.

¹⁴ Ya bwehe bu Mfumu a bihi bu bulagha buumono mu me, nde aagwi me kana ya dzyi bi biikafa mu bumõ ya Yiisu-Kriste.

¹⁵ Ndagha yi yili yi a nganma ya yiili baara bwohono bakughu okihi yo: Yiisu-Kriste aagwi na nsie mu oyabvwuhu banga-a-masumu. Ya me, me ndi mbwuru wu a nsomo na kara li banga-a-masumu.

¹⁶ Lo Nzaami aamono me nyĩ, mpaala mu me, wu ndi wu a nsomo, Yiisu-Kriste asuo mukolo a

nde wu munene ti anga efaana kundaa babo ba baasa kana mu nde mpaala babagha laama lili mibvu ya mibvu.

¹⁷ Nyaã nsia ya budziri bikala kundaa Mukogho wu matala mwohono, wu aagwene okamojono, wu aagwene okakpa, Nzaami yini a mumõ, mu mibvu ya mibvu! «Aamene!»

Odzwana mvulu yi mbwe

¹⁸ Timote mwana a me, me ntumu we mu odzwana mvulu yi mbwe, ti bwunu a bu oli mandagha ma ótswama olyele mibighili mu nkooro a we, mpaala we bagha mpini mu mo,

¹⁹ we bukebe kana ya bitsimi bi bibwe. Bitsimi bi bibwe bibye, babake baatsili bye ya baadzihibi kana li bo.

²⁰ Imene ya Alesandere bali ña kara li baara babo. Me aanyaghala bo ña myaã mi Satana mpaala bo banyaã ofirikatsua Nzaami.

2

Osamana mu nkooro a baara bwohono

¹ Mu obo, nsomo-a-nsomo me gwi be mpama mu akaluomo, mu okasamana, mu ookabuono ya mu okabvurulu matuono kundaa Nzaami mu baara bwohono,

² mu nkooro a mikogho ya mu nkooro a baara bwohono ba bali a litumu, mpaala bihi-a-be likala a bumweë bubu edzuunu ya bubu pii, mu enzaami kyehehe ya budziri bwohono.

³ Obo oli bubwe ya Nzaami wu li Mubvwuhu a bihi-a-be aakadzyi obo.

⁴ Nde dzyi ti baara bwohono babvwughu ya bakala a ligyhaba li enganma.

⁵ Mu kuulu Nzaami li yini a mumõ,
ya mbwuru wu aakabvurulu endughu ña kara li
Nzaami ya baara li yini a mumõ,

mbwuru munde me Yiisu-Kriste,

⁶ nde wu áafiri ekolo mu nyuru a ndeme mu
nkooro a baara bwohono:
Bubo me bumpughulu bu básuo mu matala ma
ósuolo Nzaami.

⁷ Me mu obo Nzaami ásuolo me mu okala wu
aakata mukwughu, ntumu (me enganma ndyele,
me ka mpfiri mpya o) ya muluo kundaa baala ka
bali ba-Dzwife o, mu kana ya mu enganma.

Babaghala ya bakaha mu libwunu li Nzaami

⁸ Mu obo, me ndzyi ti babaghala bakasamana
Nzaami mu bibini byehene, bakaseene myaã
mimi ngili ku yulu, wene a nkehe, wene a min-
sohobo.

⁹ Bumõ si kundaa bakaha, me ndzyi ti bo
bakalaha nda-ndaha yi budziri, yiili baara ka
bakughu omono budzwa mu yo o, wene a mubili
a nyuru. Bo ka bafaana okakuru bibara bi mfu o,
ka bafaana okalaha milwu ya nsia bibi mu oore
o, ngu okala nsia, bwunu we binkuru bibi ntala
yi alagha.

¹⁰ Lo bo bafaana okasuo bigyighili bi bibwe, ti
bwunu a bu ofaana kundaa bakaha ba baakalyele
ti bo baakasamana Nzaami.

¹¹ Nyaã ti mu matala mama ogyighi mandagha
ma Nzaami, mukaha akala pii ya kunsu okihi
kwohono kuu litumu li ba baakaluo nde.

¹² Me ka ngwi mukaha muswa wu oluo o, ngu okala mu okala a litumu ña yulu a baghala. Nyaã nde akala pii.

¹³ Mu kuulu me Adã Nzaami átswama obuo ya ña nseele nde ábuo Ebve.

¹⁴ Ya ntaala ka ápfiri Adã o, lo mukaha nde ápfiri, me mukaha áabagha ebili kundaa Nzaami bu átsumunu ngili.

¹⁵ Lo nde sa akarabvwughu ña aaburu nde, kala ti nde kebe kana, dzyi, kala ti nde li wu báseme ya bátwulu mu libee mu osalala Nzaami ya nzya-nzyara yi mbwe.

3

Bambiri ba libwunu li Nzaami

¹ Ndagha yi yili yi a nganma: Kala ti mbwuru dzyi okala mumbiri a libwunu li Nzaami, ekye esala ki ebwe nde adzyi.

² Me mu obo, mumbiri a libwunu li Nzaami faana okala mbwuru wuulu ka baabagha ndagha yi baasyeme nde o, mulumu a mukaha yini a mutsyini, wu li a nzya-nzyara yi a faana ya yi a budziri, akala mbwuru wu aakuru nyuru ya wu li a nzya-nzyara yi mbwe, akala mbwuru wu akabwana a banzyi, mbwuru wu kughu oluo.

³ Anyaã okala enkolo-mala, anyaã okala a nzuñu, lo akala mbwuru wu aakasa kuulu ti baara bakala mu eyiẽ, mbwuru wu aakasa ti baara bakala mu edzuunu ya wu gwene a ntono a nzi.

⁴ Nde faana otumu nzo a ndeme bubwe ya baana ba nde bafaana okala mu litumu li nde mu budziri bwohonono.

⁵ Mu kuulu, kala ti mbwuru ka soolo otumu nzo a ndeme o, bunu a bo nde aatumu Libwunu li Nzaami?

⁶ Nde anyaa okala mbwuru wu munyaghara mu enzaami, mfangolo ligwagha lidzwi nde mihi ya nde somo mu mumfwunu a dyabulu.

⁷ Ofaana si ti baara ba bali ku mbala a libwunu basuo bumpughulu bu bubwe mu nde, mpaala baara banyaã otsaala nde ya nde anyaa okogholo mu myere mi dyabulu.

Basala ba Nzaami

⁸ Bumõ si, basala ba Nzaami bafaana okala baara baba budziri ya banga a enganma. Banyaã okala binkolo-mala ya okadzyi busini bu baak-abagha mu manzili ma mabi.

⁹ Bo bafaana okakebe mu bitsimi bibi tse-tse mansweghe ma kana ma ósuo Nzaami.

¹⁰ Nsomo, bafaana oluhu bo mu bigyeele ya na nseele, kala ti ka babagha ndagha yi baasyeme bo o, bo bakughu osala esala e Nzaami.

¹¹ Bakaha si bafaana okala baba budziri, ba bagwene a makuhu, ba bali a nzya-nzyara yi faana ya yi a budziri. Bo bafaana okala baara baala mu nswe ndagha bakughu osa kana mu bo.

¹² Musala a Nzaami faana okala a mukala yini a mutsyini, ya nde faana okatumu baana ya nzo a nde bubwe.

¹³ Mu kuulu, baara ba baakasala esala e Nzaami bubwe, sa bagwa bo budziri ya bo sa bakala a emiini ki elagha mu kana li lili mu Yiisu-Kriste.

Mansweghe ma mpaana a enzaami

¹⁴ Me nsono we mandagha ma mu emiini kiili ti edzi-dzighi me sa ngyamono we.

¹⁵ Lo kala ti me ka mbaangya o, we sa soolo bunu a bo we aadzyara munsá nzo a Nzaami, yili Libwunu li Nzaami wu a mweẽ, kwii li linene ya li ookasiñi engañma.

¹⁶ Ya oli ngañma ti mansweghe ma mpaana a enzaami mali ma manene:
Yiisu-Kriste ámonono ti anga mbwuru,
bási nde mbwuru wu bunsumu mu Mufulu a Ngili,
nde ámonono kundaa bangye-yulu,
bátsala nsia a nde kundaa bikaana byehene,
baara ba nsie básí kana mu nde,
Bágyene a nde ku yulu munsá nsia.

4

Maluo mama mpya

¹ Ankoho, Mufulu a Ngili li mu olyele mu mpere ti mu matala mama masini, ndaama a baara sa batsili kana li bo mu onama mifulu mimi mpya ya maluo ma maakafa kundaa mifulu mi mibi,

² mu bumpibi bubu embili-a-mbili ki banga a mpya ba básí elyimi mu bitsimi bi bo mu esyeẽ ki ebie mu mbaa.

³ Bo baakalighi baara okie ya baakagwa bo mangili maala banyaã okadza bilogho bibike, ankoho Nzaami ágyighili bye mu kuulu ba baakasa kana bakadza bye mu okabvurulu matuono bu basoolo engañma.

⁴ Mu kuulu byehene bi ógyighili Nzaami bili bi bibwe, ya ka oli a si emõ ki baatsili o, lo bafaana odza kye mu okabvurulu matuono,

⁵ mu kuulu mu ndagha Nzaami ya mu lisamana baakasa ti bye byehene bikala bibi ngili.

Nzaami li mubvwuhu a baara bwohono

⁶ Kala ti we luu mandagha mwohono ma kunda bandughu mu kana, we sa kala musala a Yisu-Kriste wu mubwe, wu baakabununu mu mandagha mama kana ya mu maluo ma mabwe ma aakanama we matala mwohono.

⁷ Lo we bihi masaba ma magwene a mupfunu maala ka mali mama kana o, masaba ma binjini bi bakaha.

Lo we sa mpini mu okala a enzaami ki ebwe.

⁸ Mu kuulu bimpa bi biikagwa nyuru mpini ka bili a ndaana yi alagha o. Lo enzaami eli a mupfunu mu myehene: Kye eli a misiini mimi laama lili lolo ya lili bitsughu bi biigya.

⁹ Ndagha yi yili yi a nganma ya yiili baara bwohono bakughu okihi yo:

¹⁰ Kala ti bihi-a-be lili mu okamono mpara ya lili mu okadzwana mvulu, mu kuulu bihi-a-be liisi emiini mu Nzaami wu a mweë, wu li mubvwuhu a baara bwohono, ya bvulu-bvulu banga-a-kana.

¹¹ Mamo mandagha ma faana otumu ya oluo we baara.

Efaana kundaa banga-a-kana

¹² Mbwuru anyaa otsaala bufulu bu we! Lo we kala efaana kundaa banga-a-kana mu mbiili, mu nzya-nzyara, mu dzyi, mu kana ya mu mukolo wu a tse-tse.

¹³ Tee mu matala ma akala aangya me, sa makpa mu okantaã Biso bihi ngili na nkulu a baara bwohono, mu okagwa babake mpama ya mu okaluo.

¹⁴ Ka menene ekaba kii bwehe bu Nzaami ki eli mu we o, ekaba ki bagwi we mu nzili a libighi ya

ṇa ónaã we emvuṇunu ki bakwuru ba libwunu myaã ṇa yulu a mutswi.

¹⁵ Sa mandagha mamu mu mukolo mumõ, gwa nyuru a we yohono mu esala ki mpaala okulu o we omonono ṇa mihi mi baara bwohono.

¹⁶ Kahala mihi mu nyuru a weme ya mu maluo ma we. Sa mukama munsa mandagha mamu. Mu kuulu, we bu si obo, we weme sa bvwuhu ya baara ba baagyughu wehe si sa babvwughu.

5

Mi bafaana osa kundaa baara ba libwunu

¹ Ka akasyeme emini mu ebaghala o, lo kagwa nde mpama ti anga we li mu okagwa taara a weme mpama. Aakagwolo minkuru-mbala ti anga baana ba ngughu a we,

² bakaha ba bakwuru ti anga bangughu ba we, batughu ti anga bankele ba we, ya mukolo wu a tse-tse.

Bapfiili ba bakaha

³ Aakagwa bapfiili ba bakaha, maa ngu bapfiili, ba bali a nzala a libaha budziri.

⁴ Kala ti mupfiili wu mukaha li a baana bwunu we bateghele, nyaã ti nsomo baana ya bateghele babo basuo enzaami e bo mu manzo ma bomu ya mu okabvurulu bubwe bu ósi bo biburu bi bo. Obo me bu ookadzyi Nzaami.

⁵ Lo maa ngu mupfiili wu mukaha wu aasyili ngasighi, wu aasi emiini e nde mu Nzaami, nde aakasa mukama mu okasamana ya mu okabuono mpyibi ya mwĩ.

⁶ Lo mupfiili wu mukaha wu li kunsu bisee bi nsie nde li wu a kpi, ngu okala ti nde li nkini mweẽ.

⁷ Mimye mikele mi faana otswa we bapfiili ba bakaha, mu kuulu banyaã obagha ndagha yi baasyeme bo.

⁸ Ya kala ti mbwuru ka aakabaha badzighi ba nde o, bvulu-bvulu baara ba bali mu nzo nde, lo nde aatunu kana li nde, ya nde bvulu bubi ya mbwuru wu gwene a kana.

⁹ Mu osono nkwumu a mupfiili wu mukaha mu mukaana wu a emvununu ki bapfiili, nde faana okala a bamvulu obaana makwumu-masemene (60) tee ku yulu, ya wu áali mukala a baghala yini a mutsyini.

¹⁰ Baara bafaana osuo bumpughulu bu bi-gyighili bi nde bi bibwe: Nde aakwuhu baana ba nde, nde aakabwana a baara mu nzo a nde, nde aakaswagha myili mi baba ngili, nde aakabaha babo ba bali mu mpara ya nde aakasalala bigyighili bi bibwe.

¹¹ Lo we ka sono mankwumu ma bapfiili ba bali nkini batughu o. Mu kuulu, mu matala ma baakala a bo nzala a ofirikie, bo baakabihi Kriste.

¹² Obo me bu baakasomo bo mu mumfwunu mu kuulu bo baakatunu mukihi wu bálaba nsomo.

¹³ Ndagha yinke me yi, bo bu bagwene a esala ki baasa, bo baakabulugye mu manzo ma baara, lo ka yini a mu nkooro a ku bagwene a bo esala o, lo mu nkooro a nkele ya embili-a-mbili e bo. Bo baakabulubili mu mandagha maala ka bafaana obili mu mo o.

¹⁴ Mu obo, me ndzyi ti bapfiili ba bali nkini batughu bafaana ofirikie, bafaana oburu baana, bafaana okala bakaha ba babwe mu manzo, buulu banyaã ogwa mutaara nzili yi obili bubi bu banga-a-kana.

¹⁵ Mu kuulu, bapfiili ba bakaha babake ŋa kara li bo baasihi nzili a Mfumu mu onama Satana.

¹⁶ Kala ti nga-a-kana wu mukaha li a bapfiili ba bakaha mu badzighi ba nde, nyaã nde abaha bo ya leme lilo linyaã ogya ku yulu a libwunu li Nzaami, buulu libwunu li Nzaami libaha maa ngu bapfiili ba bakaha.

Bakwuru ba libwunu

¹⁷ Nyaã ti bakwuru ba libwunu ba baakatumu bubwe bagwa bo budziri bu bulagha ya bu bufaana, bvulu-bvulu ba baakamono mpara mu esala kii okatsala nsia a Ndagha a Nzaami ya kii okaluo.

¹⁸ Mu kuulu, Ndagha a Nzaami yiikalyele ti: «We ka kuru muŋma a ngoomo wu li mu okasala mu matala mama okele bimburu o,» ya: Musala faana obagha mufuru a nde.

¹⁹ Ka kibi o ti bayafwunu mukwuru a libwunu kundaa we, kala ti ka «ŋa nkulu a bampughulu buolo bwunu we batere o.»

²⁰ Ŋa mihi mi baara bwohono, aakasyeme ba baakasa masumu, buulu babake babagha nza-lamweẽ.

²¹ Ŋa nkulu a Nzaami, ŋa nkulu a Yiisu-Kriste ya ŋa nkulu a bangye-yulu ba básuolo, me ntswi we mikele mi mu okasalala mandagha mamu mu bunsumu wene a munsuolo a bidzili.

²² Ka naã myaã mu maswa-maswa ña yulu a mutswi a mbwuru o, mara we kala mu mfwunu a masumu ma mbwuru mukimi. We weme, aakakala wu a tse-tse.

²³ Mu nkooro a mila mi miikatswa we matala mwohono ya mabyele mama mu mweẽ, ka akanma yini a madza o. Aakanma si mana bviini.

²⁴ Masumu ma baara bana maakamono nsomo basa bo mumfwunu. Lo masumu ma baara babake maakamono yini a ña mbihi.

²⁵ Bumõ si, bigyighili bi bibwe biikamono ña mihi mi baara bwohono, ngu okala bibye biili nkini biimono o, bye ka bikughu osweme o.

6

Bankana

¹ Nyaã ti baara bwohono ba bali kunsu bunkana bagwa bamfumu ba bo budziri, mpaala banyaã otsaala nkwumu a Nzaami ya maluo ma bihi.

² Ya bankana ba bali a bamfumu banga-a-kana banyaã okatsaala bamfumu ba bo mu kuulu bo bali bandughu mu kana. Lo bo bafaana okasalala bo ku obvulu bubwe mu kuulu bo bali mu okasalala banga-a-kana ya bandughu ba bo baba mukolo.

Mamo ngu mandagha mafaana okaluo we ya okatumu.

Enzaami kii nganma

³ Nswe mbwuru wu aakaluo maluo makimi, ya ka li mu okanama mandagha ma mabwe mama Mfumu a bihi Yiusu-Kriste o, ya maluo ma mali bwunu a bu oli enzaami,

⁴nde ka li a ligyahaba o, mubili a nyuru aadzwi nde mihi. Nde li a bubyele bubu munsohobo ya mumbanana. Obo me bu ookagya sughu li mukolo, mitaha, otsaala, ya bitsimi bi bibi,

⁵mimbanana mi migwene a masini na kara li baara ba bali a mayele obyi. Bo ka basoolo enganma o, ya bo baakatsimi ti enzaami eli nzili yi obagha busini.

⁶Nganma, enzaami eli busini bu bunene kunda munde wu aakamono esee mu yini a bi ali a nde.

⁷Mu kuulu bihi-a-be ka liyabiri elogho mu nsie o, bwunu obo si na akala liimaara bihi-a-be na nsie, ka libiri elogho o.

⁸Kala ti bihi-a-be lili a bi-odza ya binkuru, bihi-a-be lifaana okamono esee mu bye.

⁹Lo babo ba baakadzyi okala a busini, baakabwa mu bigyeele, baakakogholo mu mwere ya mu sughu li mukolo li linene ya li libi li liikasohobo baara kunsu obyi ya odzimini.

¹⁰Mu kuulu ntono a nzi yiikaburu mandagha mwohonon ma mabi. Mu nkooro a yo, baara bana baadzimini ya ka baafirisyili a kana o, ya bo baamwehe manyuru ma bomu mpara yi alagha.

Litumu kundaa Timote

¹¹Lo we wu li mbwuru a Nzaami, aakabara mandagha mamu.

We faana okasagha bunsumu, enzaami, kana, dzyi, mukama ya odzuunu.

¹²We kadzwana mvulu yi mbwe yi a kana, dzarala laama lili mibvu ya mibvu li bati we mbili mu lo,

ya liili we áasuo bumpughulu bu bubwe
ña nkulu a bampughulu balagha.

¹³ Ña nkulu a Nzaami wu aakagwa byehene bi
bili mweẽ laama, ya ña nkulu a Yiisu-Kriste wu
áasuo bumpughulu mu mbiili yi mbwe yi a kana
ña busu bu Ponse Pilate, me ngwi we litumu li:

¹⁴ Kebe litumu bu kala wene a mpiri, wene a
mi baasyeme we, tee mu matala ma oomonono
Mfumu a bihi Yiisu-Kriste.

¹⁵ Omonono oko sa okala, mu matala ma ókuru
Nzaami,

nga-a-ese, Ibyala nga emõ,

Mukogho a mikogho

ya Mfumu a bamfumu,

¹⁶ yini a nde wuulu ka aakakpa o,

nde wu aakakala kunsu otsyeme kuulu mbwuru
ka kughu osomo oko o,

otsyeme kuulu mbwuru si mumõ nkini
ámaamono o, ya ka kughu omono o.

Nyaã ti nsia ya lileene bibi mibvu ya mibvu bikala
kunda nde! «Aamene!»

Bisini

¹⁷ Gwa litumu li kunda bisini bi bili mu nsie
yi banyaã okala a mubili a nyuru, ya banyaã osa
emiini e bo mu busini buulu ka buukagyili matala
malagha o. Lo bo basa emiini e bo mu Nzaami,
nde wu aakagwa bihi bilogho byehene ku olagha
mpaala bihi limono esee mu bye.

¹⁸ Nyaã bo bakasa bubwe, bakala bisini mu
bigyighili bi bibwe, banga-a-kaba, ba baakabaha
banganda.

¹⁹ Obo bo baakwu busini bu bubwe mu bomo mu bitsughu bi nkulu, mpaala babagha laama lili ngan̄ma.

Mikele mimi masini

²⁰ A we Timote! Aakakebe mandagha ma baagwi we. Aakabara mbiili yi mukan̄ana yi aagwene faana ya kana. Ka akaban̄ana mu mi mitala maluo mama ligyahaba lili mpya o.

²¹ Ndaama a baara yi aakatsimi ti yo yili a ligyahaba lilo, ka yiifirisyili mu nzili a kana o. Nyaã bwehe bu Nzaami bukala ya be!

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d